

MAXIMILIANI IMPER. & REGIS DECRETUM II. ANNI 1567.

Praediales Nobiles non dicentur. Eorum homagia et juramenta, aequiparantur aliorum Nobilium Regni.

Articulus 14.

Item statutum est, id quoque ex clementi annuentia Majestatis Suae; ut Praediales quarumcunque Ecclesiarum (qui in Ungaria et Sclavonia, iisdem fere semper praerogativis usi sunt, quibus alii possessionati Nobiles, et quorum homagia et juramenta aequaliter semper cum aliis Nobilibus fuerunt aestimata) non dicentur.

Gratuitus labor incipit, dierum duodecim.

Articulus 17.

§. 5. Ex Comitatu vero Szaladiensis excipiat Insula, quae est inter fluvios Dravum et Muram, cum duabus extra Insulam villis Patha et Chatar, quae laborent ad castellum Domini Comitis de Zrinio, Legrad, quod ad Insulam defendendam illam, opportuno loco situm est.

Differentiae inter Nicolaum Jurissith et vicinos Nobiles, in Oppido Köszezh cognoscantur.

Articulus 44.

Controvertuntur etiam, inter Dominum Nicolaum Jurissith, Capitaneum in Köszezh *), et certos Nobiles Comitatus Soproniensis et Castriferrei, differentiae quaedam super certis metis et territoriis, ac ratione cujusdam terrae, Szekföde appellatae; super qua etiam literae adjudicatoriae, tam ex Germanica, quam Ungarica Cancellaria extradatae, apud certos Nobiles extare dicuntur, adhuc tamen inexecutae.

§. 1. Dignetur Majestas Caesarea et Regia mandare; ut literae illae adjudicatoriae executioni demandentur et differentiae omnes inter dictos Comitatus et Nicolaum Jurissith, medio aliquorum Commissariorum, ad certum terminum per Majestatem Suam praefigendum, revideantur et complanentur **).

§. 2. Non dissimiliter etiam dignetur Majestas Sua, ad certum terminum Commissarios constituere (communicato negotio, cum Serenissimo Principe Domino Carolo Archi-Duce Austriae, Fratre Majestatis Suae charissimo, Domino eorum gratiosissimo) et limites, ac metas inter Sclavoniam et Styriam, vel Carnioliam revideri facere et imperare; ut quaelibet pars suis finibus sit contenta.

*) Nicolaus Jurisić nobilis Croata Segniensis, immortalis defensor ejusdem oppidi, nunc civitatis Köszezh seu Ginsiensis.

***) Vide, Rubric. Jur. Ung. ad b. art.